

عازفة على أوتار الحياة

* الكتاب: عازقة على أوتار الحياة (خواطر نثرية)

* الكاتب: سوزان الفطيري

* مراجعة لغوية: محمد طلبة

* تصميم الغلاف: شجاء أبو طالب

* إخراج داخلي: سليل الفراغة

* رقم الإيداع: 2022/2692

* التقييم الدولي: 978-977-6968-03-5

المدير العام: عزيز عثمان



daralmuntadaa@gmail.com

لمراسلة الدار:



01005186476

واتس آب:



صفحة الدار على موقع فيسبوك: دار المنتدى للنشر والتوزيع



صدر عن دار المنتدى
بالتعاون مع دار المثقف

المثقف

للنشر والتوزيع



9 789776 968035



جميع الحقوق محفوظة لدار المنتدى للنشر والتوزيع

كل ما ورد في هذا العمل مسئولية مؤلفه، من حيث الآراء
والأفكار والمعتقدات، وكونه أصيلاً له غير منقول، وأية
خلافات قانونية بهذا الشأن لا تتحملها دار النشر.

(خواطر نثرية)

عارفة

على أوتار الحياة^s

سوزان الفطيري





إهداء

أهدي كلماتي لشريك عمري ورحله حياتي
زوجي العزيز
الذي أسعدني طيلة مشواري معه
بكل حب وعطف
واحتواء.....



إهداء، لشاعرنا الأبنودي

وحشتنا يا خال

وحشنا كلامك ورنة الخلخال
وشجرة اللي في ضلها
كتبت ميت موال
وشكيت لها على الحال
وأكلنا من طرحها
ووهيبة قعدت تحتها
تسمع لك الموال

وحشتنا يا خال
وحكاية شجرة الرمان
دي كانت حكايتك زمان
حكيطنا عليها
مهما سمعناها نحبها
مش أي حد يحكي عنها
بخفة دم صاحبها عن الرمان

يا بخت من عاش زمن الأسطورة

شاعرنا عبد الرحمن

وحشتنا يا خال

يا أبو الحكاوي والغناوي والموال

أوعذك يا خال هفضل أكتب قصتك

ولا هنسى كلمة كتبتها ولا غنوة ولا موال

وحشتنا يا خال



جافاني النوم

جافاني النوم
وكنت يا قلبي مرتاحة وأنا وياك
كنت يا قلبي.. بحس بالراحة
كفاية كان نَفْسُك.. يونسني يانسني
راح النوم من عيني
وأنا برجع بأيامي معاك
دا حبي كان من صغري.. وقلبي معاك
وكنت بتمنى أكون وياك
ولما أشوفك يدق قلبي
وودني تسمعه.. أحب هواك
كنت الفارس اللي حلمت أنا بيه
وحقق ربي ونولتك وبقيت ليا.. وأنا ليك
وعشنا أيامنا ماليش غيرك.. وحوَّطت عليك
يا نور عيني كنت صبية
وفتحت عيني عليك
دا حضنك كان الدوا ليا.. وفين ألاقه

أعيش إزاي من غيرك.. يا كل مُنايا
كثير أندهلك وماتردش

أكون بحلم

عارف لما بتندهلي.. برد عليك
في لمح البصر أكون بين إيديك
تاخذني في حضنك.. أبوسلك إيديك
تطبطب عليا.. أنا على صدرك
في لمح البصر.. أكون بين إيديك

تطبطب عليا.. أنا على صدرك
أسمع لحن قلبك.. يقولي بحبك
تطمنلي نفسي
وأروح أنا دغري.. في نومي العميق
انده عليا.. هرد عليك

تطمنلي قلبي
وأروح أنا دغري.. في نومي العميق
انده عليا.. هرد عليك
اسمعني يا عصفور



اسمعني يا عصفور
مهما نفشت.. ريشك
واستعظمت على.. عيشك
مسيرك يجي يوم عليك.. ويتنف ريشك
خلي بالك من الزمن.. هيعريك
خليك محترم
يقدرك ناسك.. وتعيش على عيشك
خليك بألوانك.. ولا تنفش ريشك
تعيش بين ناسك.. يحكوا عليك
وعلى ريشك
وترفع رأسك.. لفوق أحسن ما يتنف
ريشك
خدها كلمة مني
أنا صاحبك وأخاف عليك
وعجبني لون
ريشك



ارجع يا زمان

جيلي معاك
حاجة ترجعلي شبابي
ويا ريتها طفولتي .. من الأول
هاتلي حضن الأم
بتسر حلي شعري
وتشيل عني الهم
هاتلي حدوتة أحلم بيها
طول العمر
وهاتلي الأب اللي ياخذني في إيد
ويحطني على الحجر
حجره براح، أفرد نفسي
عليه وأرتاح
وهاتلي أخويا وأختي
اللعب والفرحة والضحكة واللمة
وأكلنا مع بعضنا
وده يفتح نفسنا

لو كان حتى.. عيش وملح

ما يهمننا

كفاية إننا مع بعضنا

هاتلي الجار اللي

نخاف على.. بعض مش بهزار

عايز راحة البال

اللي ما ينفع فيها

كتر المال

هاتلي الحب الصادق

من غير زيف

ورغيف العيش.. كان له طعم

هاتلي أشرب مياه

ترويني وتنسيني

حكايتي

عايز عمري اللي راح

وطفلي اللي جوايا

يهلل يفرح عشان



أرتاح
وزمني وعيلتي وكل أحبابي والأصحاب
ويشيلوا عني تعبني وهمي
وفي حضنهم أرتاح
قبل ده كله...
أبويا وأمي وأخويا وأختي
عايز أغمض عيني
وأفتح أرجع تاني
ياريت يا زماني
لشوقي لحبي
لعمرى لكل ما ليا
وأنسى.. سنين فأت من عمري
حمل كتير على أكتافي
ياللا يا زمان أرجع تاني
لحضن الأم..
وإخواتي وأصحابي
دي عشرة عمر
ياريت أرجع تاني

حنان

الحلوة لبسالي فستان

بتقول دا حشمة

وهو من غير أكمام

وطوله شبرين

وما بين الرجلين

بصراحة ملفوفين

بيض وحلوين

والجزمة دي كعبها

عالي ولونها لايق

على الرجلين

حمالة واحدة دا

الفستان

بتقول دي موضنة

وأنا غلبان

والوسط مربوط بحزام

والشعر نازل متهدل



ألوان ألوان
والعقد في الرقبة
مجليها كمان
والخدود وردية
والبق خاتم سليمان
والشفاف حمرا
رمان
أما العيون
عيون غزلان
والرمش مغطيها
بكل حنان
الله على جمالك
يا حنان



حلم الحياة

قولولي أرجع الزمان إزاي
طفولتي وضحكتي قبل الأوان
وحضن أمي العمق كان فيه إزاي
وفرحة أبويا وقعدتي في حجره
فيه البراح وأنا عليه
مرتاح
ولمة إخواتي حواليه
فرحانين بيه من أصغرهم ودايمًا حواليه
فين جريبي في الغيطان وشجرة
الرمان وألونها الجميلة
تسر العين
فين الأهل والخلاّان
وسهرة من ليالي زمان وشوي الذرة
وريحته تملا المكان
وضحكة صافية
من القلب وفرحتنا

بلمتنا.. وقلتنا تروي
العطشان. حتى الميه
كانت لها طعم زمان
رجعولي زماني
أغني على الربابة
وأشجي خلي وجيراني ويقولوا لي
عيدلنا من تاني، وأعيد وأزيد والفرحة مالية كياني
وصوتي كان حلو
ما أعرف جراه إيه
من بعدي عن بلدي
وناسي، ولا من شيل
الهم.. فينك يا ضحكاية
تشفي وتكوني دوايا
تكوني بلسمي تداوي
كل اللي جوايا
فين يا ناس البراح
وحجر أبويا اللي راح
وحضن أمي جوا قلبي.. يطبطب عليا

ينسيني كل الأسيّة
والهم اللي حواليا
يشيل الحمل عني شوية
مشتاق أرجع للصبا تاني
كان مكاني وكل أحلامي
وضحكتي وفرحتي
وسكني وعزوتي
وقلوب صافية
تنول لي ضحكتي
يا ريت الزمن يرجّعلي شوية
من فرحتي

مناجاة

مناجاة

يا أغلى من روعي عليا
يا روعي ونور عينا
يا كل ما في الدنيا ليا
بنادي عليك
يا كل الحياة
يا رمز النقاء
يا فيض الحياة
جميلك عليا
عمري ما هنساه
بنادي عليك..
شايلني في قلبك
وجوا النني شايفاه
يا ضحكة حياتي
وبسمة.. سعادتي
يا طفلي المحب



أداديك.. وتداديني
في فرحي ألاقك
وفي زعلي.. تداويني
بنادي عليك..
يا بهجتي ومُنايا
يا عشقي وسندي
يا طاهر ونادي
كل اشتياقي
بيعت سلامي
وحبي وهيامي
لزهرة فؤادي
بدور وأنادي..
عليك يا حياتي



مسافر

تطلبني إيه مسافر
أطلب منك تدعيلي
يخليلي ولادي ويطمئنني عليك
ولما تروح عند الكعبة ناديلي
أنا مشتاق

ولما تسعي تقول
يا رب اشفيني
ولا تقفللي باب
وسلملي على الأحباب
ولما تروح عند الحبيب في المدينة

وانت داخل سلملي
عليه وادعيلي
أروح للحبيب
وأصلي عليه

وفي الروضة الشريفة

أناجيه.. يا حبيبي

يستر عليا وساعة

الحساب يشفعلي

وأنا تحت رجليه

اوعى تنسى تدعيلي

وصيتي

تصلي ركعتين لله

وتطلب إنه يشفيني

من ألمي يا نور عيني

اوعى تنسى

أكل الحمام وانت

هناك، خده معاك

واندرلي

ندر وانت هناك

لو ربنا راضاني

أحصلك وأكون وياك

هاتلي

سبحه أسبح عليها
بقية سنين عمري
روح يا ابني
بالسلامة وسلملي
على الحبيب المصطفى
وكبر وهلللي

الندم

يا ربي أنا ندمان
ليه القسوة عليا
سنين عمري ضاعت
وأنا الغلطان
يا ريت يرجع الزمن
بيا في غربتي ديه
وأرجع لبلدي لغزوتي

أنا الغلطان
لو حتى أعدي بحور
وأعقد النية أنا ندمان
على عمري اللي ضاع
في زمان
أرجع لداري وأهلي
دي الغربية تقصر العمر
أقول بيتي فين

أنا الغلطان
أبكى على أرضي
مشتاق وليلي يطول
شلتيني، بعدتيني
عن أهلي وعلى الخلان
وأمي وأبوي
وعمي كمان

أنا الغلطان
أولادي نور عيني
ما شفتهم بقالي
زمان
شبابي ضاع مني
وشعري شاب
سنين
فاتت طويلة عليا
وأنا مطحون



أنا الغلطان

أروح شغلي ويومي
يطول وأرجع بيتي
مش قادر أنام على
طول، دي تبقي عيشة
لكن أنا الغلطان

ذكريات

قولولي أعمل إيه
ذكرياتي راحت
في الصندوق معاه
وفضلت الآلام معايا
والحياة ما بقت حياة

قولولي أعمل إيه
مش عارفة أفكر
اللي فيه
خد عقلي وفين
ألاقيه

الدمع نازل على
خدي بيكويه
قولولي أعمل إيه
قلبي بينده عليه
يا عزيز يا غالي

وأقول في نفسي
سابني ليه؟
أستغفرك ربي
أخذت وديعتك
وسبتني ليه

قولولي أعمل إيه
يا رب عقلي جراه
إيه
مسجون ومتحوط
عليه
رحت لطيب يداويني
لقيت مكتوب على
الدوا إيه
إنه بينيم، والنوم
هيفيد بإيه
عايزني أنسى
وأنسى ليه؟

هو اللي شفته
يتنسي إزاي وليه؟
قولولي أعمل إيه

راح اللي راح
وفضلتلي الجراح
والدمع على خدي
يكوي
الدوا هي عمل إيه
هنام وأصحى
واللي فيه هتلاقيه
قولولي أعمل إيه

حبيبي الغالي

حبيبي الغالي
على بالي
وبحلم بيك
وأنا نائمة
بفكر فيك
وأنا صاحبة
بنادي عليك
وبسمع صوتك
ترد عليا
بتهيألي
أجري عليك
وفاردة أيديا
عشان أحضن
فيك
واحشني يا غالي

وطايرة في السما

بيك

غيا بك عني

دا طوّل، وأنا

بحلم وأفكر

فيك

إمتى في يوم

تفرحني

وترجع ليا

وليك

بستناك

وعلى شط البحر

أشم هواك

وعيني تغفل

وأحلم بفستان

الفرح لابساه

وتخطفني



على حصانك
وأطير وياك
حلم كثير يتكرر
وأنا على شط البحر
عاشقك
بفستاني الأبيض
وعلى الحصان
راكباه وموجة
تروح وتيجي
موجة تصحيني
وبردو معاك
حبيب عمري
وكل حياتي
كلها وياك
في صحوي
وفي منامي
بحب هواك



يا ريتك
تيجي متأخرش
أنا جاهزة بفستاني
ومستنية على حصاني
بفكر فيك

بيتنا

بيتنا كان وكان
بيت أبويا وأمي
كان

كنا فيه خمس جيران
كانوا هما كل الحياة
إخوات صحاب حبايب
مش جيران
أسرة واحدة
البيان متفتحة
كنا وحدة
متجمعين

في الفرح مشبوكين
لقمة وملح مبسوطين
القلوب الصافية
كافية مش متعنظين
كنا صحبة أطفال



من صغرنا نلعب
نروح المدرسة مع
بعضنا متجمعين
يوم الأجازة نقضي
يوم مع بعضنا
والغدا في شقة
واحد منا
فرحانين مزقتطين
والأب اللي فاضي
يشرح لنا علوم ودين
واللي يغلط منا
يشرحله تاني جمعتين
كانت حياة
لا فيها خناق
كلها أخلاق
وجد وعمل
وحب ووافق
راحت فين

دلوقت أحكي
عليها وأقول
هاتولي بيتي
والحيطان
اللي شهدت عليه
من زمان
اللي عشت فيها وحسيت
بالأمان
هاتولي الحب بتاع
زمان
هاتولي سلمي
أتنطت عليه
وأجري قوام
ألحق أبويا
اللي نسي القمصان
تروح للمكوجي
بتاع زمان
كان يكوي برجله

ويغني أمان
أمان يا لاللي أمان
فين راح عمي علي
بياع السوداني
بقشره سخن
ينده عليا وإحنا
نناديه وننزل
أكل فيه مبسوطين
هاتولي بيتي
أفتكر فيه الصبا
وبنت الجيران
وحدوة اسمها
على الحيطان
كان حب طاهر
وبعد ما خلصت
اتجوزتها قوام
هاتولي بيتي
بتاع زمان

شارعنا كان نضيف

كل واحد قدام بيته

ينظفه والتعاون

ما بينا كثير

والشجر نسقيه

ونهدبه

وضله كان حكاية

والهوا يهفهف عليه

وإحنا قاعدين

تحتيه في ليلة

قمر ينور علينا

في المسا

هاتولي بيتي

اتولدت وفيه كبرت

بس حافظه طوبة طوبة

وأحكي عنه للولاد

بيت قديم لكن عظيم

ودي حكاية السنين

الفيس الفيس

الفيس الفيس
شيطان وقلب الدماغ
كنا عارفين بعضينا
خال وعم وصاحب
وأخينا
دلوقت مش عارفين
بعضينا
في شقة واحدة
وكل واحد واحد جنب
والشاشة هتخرم
عينينا
ومفیش صوت
والكتمة كانت بدري
علينا
والكل شغال
تيك توك



هيافة واختراع
أفندينا
واحد مالوش شغل
قلبها على ولادنا
وأهالينا
وفاكر دمه خفيف
والدم يلطش
يا أفندينا
خارب بيوت
طلاق كتير
وفرق قلوب
ونقول العيب على
أهالينا
ارحمنا يا رب من
اللي اتعمل فينا
إحنا غلابة
شايلين بعض
جه المخفي




حط علينا
عامل زي الخفاش
لزق في الوش
وإيه اللي يطلع
من اللي أدمنوه
وطز فيك وفينا

ونيسي

ونيسي

سيبتني بين الحيطان
ضاقت عليا وسط الظلام
كنت شمعة مابتنطفيش
في كل ركن نورك يبان
عيني عليك يا زمان

قهرتني وكسرتني
وسط الحيطان
مفيش حبيب يحضنك
يطبطب عليك
السقف نازل يخنقك
والحيطان بتطبق عليك
عيني عليك يا زمن
مين يحتويك يحميك
مهما فرحنا، الغطا يعريك



والسقف ينزل

والحيطان تداريك

عيني عليك يا زمن

✿✿✿✿

خيانة

من طيبتى صدقتك
وفتحتلك بابي
وسمحت تتكلم
وشغلتلي بالي
على تليفوني
سجلتك وبقلبي
حييتك
وجرالي ما جرالي
أستنى تتكلم
تسمع دقات قلبي
أخلصت في حبي
طلعت انت أناني
كنت بتتسلى
فكرت حقاني
جرحتلي مشاعري
إيه فاضل تاني

كسرت تليفوني

مش هسمعك

تاني

والشكوي لربي

علمتني درس

مش هنساه عمري

امشي بعيد عني

والمنتقم ربي

والحق عنده

مش عندي

ودي قصتي

واللي وجع قلبي

الفراق

لم أصدق فراقك يا حبيبي؛
فأنا بين الحقيقة والمغيب
جلست أحتسي الشاي
على كرسيك
وأنا أشعر بك جانبي.. وأحاكيك
والطير الأبيض يزقزق في السماء
وأنا أفكر في هواك معي دائماً،
ولن أنساك مهما طال الزمن
تهف عليّ رائحتك
في كل ركن من أركان البيت
أراك في مجلسك..
ونومك وسكناتك..
أراك بقلبي وإحساسي
لا تفارق مخيلتي

و حينما تعود وتزفني بالكلمات المعسولة

وحشتيني أوي

ما هذا الإحساس العالي والرقّة

أفتقدك يا عمري يا شريك حياتي

سيكا سيكا

معايا قلم وأستيكة
أمسح بيهم سيكا سيكا
كشكولي له سوستة
تفتح تيكا تيكا
أول صفحة عليها
سلم مزيكا
دوري مي فاصولا
زيكا
أصلي مش شاطر
في المزيكا
الصفحة الثانية
مرسوم فيها فازه أنتيكا
وألوان الورد فيها
ألونها سيكا
يا جمال صفحاتك
يا زيكا

رسام وعظيم
زيكا زيك
رسام وقديم يا زيك
ماليش في التعليم
هيك هيك
آخذ حمام
والدش قوام
والميه نازلة
رشاش على
راسي تنزل فشاش
وأنا أضحك مبسوط
والميه تروي العطاش
فشاش فشاش رشاش
الصفحة الثالثة بولوتيكا
سيبك منها وعديها
بلا وجع دماغ يا ويكا
عايزين نمسحها بأستيكة
الصفحة الخامسة

عن شيكا
دي كورته آخر مزيكا
واجوانه هبا هبا
لا تقولي ببو
ولا تريكة
الصفحة السادسة
هجعص عليكو
الواد زيك
ومفیش كتاب
من أساسيك
ولا فيه قلم ولا أستيك
وعجبي

العاشق

أنا العاشق
أنا الغلبان
أنا اللي الدنيا
لفت بيا في
كل مكان
لحد في يوم
لقيتني العاشق
الولهان

بدر منور
طل عليا
من الشباك
اللي قصادي
أشوفه كل يوم
وبقى دايمًا
على بالي

فانت سنة
على دا الحال
وقلت أسأل
هي مين
بعد قلبي
متعلق
ومش عارف
دي مين

بدأت أسأل
على البدر
نور العين
دي بنت مين
قالولي دي
بنت حنين
أبوها مات
بقاله سنين
وشقيت عليها

حنين
والبنت اسمها ياسمين

فرحت أنا
وعجبني اسم
ياسمين
بس يا ابني
فيه حاجة
فيه إيه؟
قلقتني
محرومة
من نظرها
وهي عمرها
ستتين

نزلت الدمعة
من عيني
وقلبي كله



أنين
حزين على
نفسي وعلى
ياسمين

العزیز

طار العزیز لأمه
بدل الجناح .. جناحین
كانت تندهله وتقوله
یا عزیز القلب والعین
اثرملت علیه وربته
على الأخلاق
وحب الناس
والخیر
طلع العزیز
راجل
وبعد لما کبر
شال أمه
زی ما شالته
جوا القلب
والعین

دعتله كتير
ربنا يزیده
من نعمه
يساعد المحتاج
اللي من دمه
ويكون عطوف على الغير
اتحقق دعاها
يحبب فيه
خلقه
ولا يحتاج للغير
وربنا يوفقه
لعمل الخير

هاتولي من الفرّح

هاتولي من الفرّح
شويات
تخلي من دمي شربات
تشيل مني الحزن
والآهات
تهدي من سري
تعوضني
عن اللي فات
عمر ما هترجع
سنين فاتت
هاتولي من الفرّح
شويات
يتصلب عودي
ويهدي قلبي
المشتاق
وتضيع الرعشة

من إيدي
وأكتبك جوابات
عارفة مش هتوصلك
خلاص الدنيا
دي فانية
لكن يتكتب
فيها جوابات
نخرج كل اللي
فينا
مقفول علينا باب
هاتولي من الفرح
شويات
أضمد فيها من جرحي
اللي نzf
وأخلص من الآهات

قليل الأصل

قليل الأصل
شاف نفسه
ومش عارف
ده من إيه

ركب عربية
وداس على
ناسه
واللي حواليه
تقدر تقولي
ده من إيه

عمللي عظيم
نسي إنه
كان حافي
حتى مفيش

بلغة في
رجليه

كان يمشي
ويداره
وجنب الحيط
تلاقيه
دلوقتي
رافع لنا منخيره
لحد في يوم
هتبقي بين

هتبقي بين رجليه
ماشي ومتقمع
فاكر نفسه
إيه
أصل دي وراثه
من أهله

والغل في

صدره

يرفض نعمته

بأيديه، ربك

لما يدي

يشوف

عبده

هيعمل إيه

وإن داس

على اللي منه

يبقى خلاص

هيشيل النعمة

عنه

ويرجع

تاني محتاس

ليه كده

يا ابن آدم

صون النعمة
يزيدك ربنا
واعمل حساب
للناس
بلاش عنطرة
فاضية
تدخل قلوب
الناس
بالذمة دي
عيشة
انت كده
محتاس

اصحى شوية
ولا تنسى
اللي عطاك ربنا
الحق قبل ما تتداس
ودي موعظة



لك وللناس
الحياة
مش كده
لازم يحبوك
الناس
بلاش العنطرة

قلبي مال

قلبي مال
والحب كان
أول سؤال
حبيتني ليه
قلبي لما شافك
دقاته زادت
رد السؤال
مع إنه كان
خايف

ييجي يوم
والكلام فيه
يتقال
إني حببت
من ساعة ما شفتك
قلبي مال
وغنيت على
الربابة ميت

موال
يا أغلى من روحي
وأغلى من كل مال
انت ديتي
اقبليني
أتجوزك في الحال
وأفر شلك الأرض
ورد
ردي عليا
السؤال
يا بنت الحلال
القلب عاشقك
ومستني
هقولك إيه
بص في عينيا
هتلاقي
الرد
في الحال

تراث

إحنا بقينا من غير
إحساس
كان وكان ده زمان
كانت قلة تروي
عطشان
وبيان متفتحة
على الغيطان

والجار للجار
ولا بينهم
فاقوس وخيار
عيشة رضية
ولقمة هنية
لو حتى
جبنة وخيار

وإن واحدة
خبزت رغيفين
تقسم لجارتها
رغيفين
في الفرح مع بعض
إيدين في إيدين
في شوار
البت مساعدين

وإن جار
اتخاقت مع جاره
ينصبوا صلح
ما بينهم الاثنين
اللي معاه يدي
لغيره بالحب
هما عايشين
روحهم حلوة
جميلة

مش متضايقين

لو حد اشتكى

من مرضه

كله معاه

متعاونين

يشيلوه وقت

العوزة

وبإخلاص

القلب الصافي

عاشين

همه، ولمة

على طبليّة

واحدة واكلين

عيشة هنية

وجيرة

وحبايب حلوين

في الليل

على المصطبة

لمة ومواويل
سهرة مع كوباية
شاي
والرضا راضيين
ببساطة
حامدين شاكرين

رسالة إلى كل أب

رسالة إلى كل أب
أغدق على طفلك
حنيناً في المهد

وفي طفولته..
علمه الأدب والاحترام
وفي مراهقته..
يكون لك صديقاً
ملتحمًا

وحين البلوغ..
تكون له سنداً
وفي الشباب..
تكون صديقاً
صدوقاً كالجبل
يكون لك طوعاً..

وبالآدب
وحينما يشد
عوده يكون لك..
هرماً
إذا اعتمدت عليه
يكون لك فخراً

وحينما تزوجه..
يكون رجلاً
من يربي على خلق
يكافأ من ربه

ولا يحمل له..
هماً

فقد ربي
على خلق
فاسع يا كل أب
إلى تربية

بلا عقد
تكون لك أسرة
كالعلم
من ربي'..
حصد
ونجح
مع الرب

غاب القمر

غاب القمر
عن سمايا
وانقشعت النجوم
وأنا بين الثنايا
أغرق أغرق
ولا أستطيع أن أعوم
انتظرت حتى الصباح
ولم أجد
إلا الغيوم
ذهبت إلى
الشاطئ لأرى البحر
فوجدت الهموم
لا لون للماء
والموج يرتطم
وسط السكون
والصوت يعلو



والريم يطفو
وقلبي تملأه
هموم
لا لا أعرف من أنا
هل كنت أغرق
أم أعوم
يا بحر دلني
على شط
أعود إليه
حتى أفيق
من الغيوم
الظلام دامس
إني أغرق أغرق
في بحر
الهموم

حبي الوحيد

مشيت عني بعيد
وكنت لي حبل الوريد
وقلبي غلق بقفل من حديد
أين أنت يا حبي الوحيد

لم أقدر على فراقك
وقلبي اليوم عنيد
دقاته تلهث تنادي
عليك وأنت بعيد
يا من كنت لي في كل
وقت عيد

لا أستطيع العيش دونك
وانتظر الوعيد
أين أنت يا حبي الوحيد
فأنت القريب البعيد



تمر الأيام ثقيلة
وأنت عني بعيد
متى يكون اللقاء
بك يا حبيبي الوحيد



رفيق الدرب

أين أنت يا حبيبي
أراك وأحس بك
بجواري فأنت مهجتي
وكل سعادتي
أسمع أنفاسك
في أذني
وأشم رائحتك
في أنفي
أنت جانبي
وأنا ألتصق بك
أنت عنواني
وكياني
طيفك يرافقني
يضلل عليّ
يحمي جنباتي
يملاً حياتي



أعيش معك
في صحوي
ومناماتي
يا رفيق الدرب
يا حب حياتي

ترياقى

ترياقى أنت
كنت لا أعرف.. المشيب
ظلمت عمري مدللة منك
ولا أحسب للعمر.. أننى أشيب
ترياقى أنت
يا كل عمري
الآن أصبح عقلى.. يشيب
مشوشة أنا
بين الحقيقة.. والسراب
آه وآه ثم آه
العين لا تدمع
لكن القلب يبكي.. على فراق الحبيب
يا رب صبرنى ولا تأخذنى لطيب
ها هو حالى
بعد المغيب
لا أصدق



أنك أصبحت.. تغيب
عني وذهبت.. بعيد
فأنا في انتظارك
يا من كنت وحدك الحبيب
آه ثم آه ثم آه

الوداع

إلى عزيز قلبي
كل يوم بحلم أشوفك
ويجيني طيفك أتطمئن عليك
أتونس بيك
أسمع نداك
أجري عليك
وأشوف عايز
وطلبك إيه
تقولي عايز
أشوفك
وأطمئن عليكي
بتوحشيني
هو ده كان وداع

ولو تعبت
تداري عليا

تقولي ما تقلقش
وتطبطب عليا
وماتخافيش
أبوس إيدك
تمسك إيديا
بين إيديك
تديني قوة
نظرة عينيك
ألاقي جواها
حنين
أحس بيك
هو ده كان الوداع
جريت الأيام
والسنين
حلوة أيامي
معاك متعلقين
مشبوكين
متفاهمين

كانت كلمتك
في الصميم
أوعى ييجي
يوم ونزعل
خلينا كده متهنيين
خليتني أرجع بالكلام
اللي انت قلته
من زمان
أقول لنفسي
هو ده كان الوداع
نفسي أحلم بيك أشوفك
أو حتى طيفك

الوداع

كان لي أغلى حبيب
كان لي عشقاً وطيباً
كان لي هو الطبيب
سندي في كل الظروف
لو مرضت فشعوره خوف
قلب عاشق ملهوف
كان في نهاري حياة
وفي ليلي مناجاة
كنت لي بحرًا يفيض
بالحنان يلين لك الحديد
حياتي معك حب فريد
وعشقي لك زاد المزيد
سنوات عمري كنت الفريد
إلهامي أنت يا حبيب

الملهم

كنت لي أحلى وأغلى رفيق.
في الدرب كنا قلبيين متعاقبين،
متمازجين، كنت لي عطرًا وطيبًا،
يشدنا حبل الوريد، أخاف عليك خوف الأم على الوليد.
كنت طفلًا مدللًا لي، كانت أيامي معك عيدًا..
أسعدتني طوال الحياة.. وتطمئن عليّ لو كنت بعيدًا.
كنت كامل أسرتي، أبي وأخي ونعم الحبيب والصديق.
كنت الجوار، وكنت الفارس المغوار.. أين أنت الآن؟
مع الشهداء والأبرار.. إلى جنة الخلد،
يا عزيز.

الكوسة

حباباكي يا كوسة
وليكي مني ألف بوسة
أحبك محشية
محطوطة في صينية
وبشورية مسقية
أو باللحمة مطهية
في برام مسقية
بطماطم مستوية
في الفرن مشوية
حباباكي يا كوسة
لحم مفروم محشية
مليانة خضرة وهنية
وفي طبق شوربة
مع جزر وبسلة
وانت متهنية
يا كوسة يا اللي صيتك

ملا الدنيا، للصحة
أكلك مية مية
حتى مع فراخ الجمعية
وقالوا عليك في المثل
اللي معاه كوسة
عمره ما هيشوف حوسة

رسالة إلى الحبيب

رسالة إلى الحبيب الذي اختاره الله في الساعة التي
يراهـا،

كان لي كل شيء في حياتي،
كان حنوناً وأباً، رحل عني وذهب،
إلى دار الحق.. اللهم أكرم مثواه،
ونور له قبره واجعله فسيحاً عليه،
وخفف عنه الحساب وأمطره بالحسنات وزد من
ميزانه الخير،
واجعله في رياض الجنة،
واسقه من حوض نبيك الكريم،
شربة لا يظماً بعدها.
وقه شر النار،
واجعله مع الأبرار والصديقين.
لن أنساك أبداً طيلة حياتي،
عشت معك أحلى حالاتي،
كنت سندي أتوكأ عليه،

كنت فرحتي وحلو حياتي،
لا طعم للحياة دونك،
أين أنت اليوم، بعيداً عني ولكن قلبي معك.
أتمنى أن ألقاك وأكون جانبك،
عشنا أجمل سنين عمرنا في سعادة،
لقد أسعدت حياتي يا كل كياني.
رحمك الله،
يا أغلى الناس، اشتقت لك.
إلى جنة الخلد يا حبيبي
عمري ما هنسأك
والدمع على خدي
لحد يوم ما ألقاك
كان نفسي أكون وياك
زي ما اجتمعنا في الدنيا
كانت أجمل أيامي معاك
بطلب من ربي تبقى ونيسي
وفي دار الحق اللقاء

فراشة

بعد العصرية أشرب فنجان
وأسرح لبعيد وأحلم أحلام
أكون فراشة ألوان
ألف الكون

وأنزل أحلى بستان
وأحط على الورد
ألوان ألوان
الأبيض هو الياسمين
وساعات تانية
أكون طائر بجناحين
ألف وأدور زي العصفور

وأحط على غصن
من غصن لغصن
أنا مسرور

فجأة انكسر الفنجان

وصحيت مقهور

لا طولت فراشة

ولا حتى عصفور

فساد

يا ناس يا اللي فوق خلي بالكم من اللي تحت،
صبرنا عليكم كثير
وإن جه الانفجار هيكون دمار
حفلات وسكر وعريضة وعقل طار
يوم الحساب هيكون عذاب
كان اختياركم وإحنا الكلاب
الموجة جاية.. وهتقلب
بيكم والغرقه أهيه
أنيابنا كبرت من القسية
خلي بالكم.. يا هفية
إننا عقدنا نية



مولود

مغموم والغم باين عليا
حزين وجاي الدنيا ليه
ليه بتخرجوني
كنتم سبتوني
كده إنتم بعتوني
لا عايز أعرفكم ولا تعرفوني
إنتم السبب زعلتوني
كنت فرحان غميتوني
أول ما نزلت صدمتوني
كنت نايم صحيتوني
بالعافية شديتوني
للدنيا خرجتوني
واكل شارب حرمتوني
جيت العذاب والشقى
زيارتكم خليتوني
أعمل إيه أنا كمامة لبسوني



وبالمطهر طهروني
وفي العزل حطوني
مش عايز أشوف وشكم ولا تكلموني
فيتامين سي شربوني
والبسوا كماداتكم قبل ما تيجولي
منكم لله يا اللي غميتوني
طفل أول دقيقة في عمره



جواب

بعت جواب لنفسي
وعملت ساعي بريد
ورحت أخبط على بابي
وسألت نفسي منين جاني بريد
وقلت يمكن من حبيب..
أخذت الجواب وفتحته.. وسرحت لبعيد
.كان فيه حبيبة وكنت أنا.. الحبيب
سافرت وخذتني الغربة.. لبعيد
وجري بيا الزمن.. نساني مين هيا
ونزلت غمامة على عينا
والدنيا خدتني.. ولما افكرت..
مابقتش ليه حبيب
جري الزمان بيه.. ضاعوا من حواليا
لا طولت حبي اللي راح..
ولا بقيت مرتاح
والزمن بان عليا

مالقيتش لنفسي براح
وحزين وكللي جراح
حرقت جوابي اللي كتبه
وفضلت ليا الجراح
ماعادش ينفع ندم
كل اللي فيا اتصدم
آه آه عليك يا زمن



ليالي

يا راحة البال..
نقول فيكي أحلى موال
ولا يكفيكي ميت موال
ودفا الراكية في ليلة برد
تجرّي الدم في عروقي
تشيل الهم
دي راحة بال
ولو في الشمس في عصرية
وضل الشجرة حواليا
ونسمة رايحة وجاية
تسر القلب وعينا
وأنا باصة حواليا
هنا ورد وريحته
جاية عليا
دي راحة بال
وشجرة في ضلها
تحس فيها حنية

ورق ناعم مندية
وعود مايل ييهفف
حواليا

دي راحة بال.. ولا مش هيا
طبعاً دي راحة بال
وعيشة كلها حنية
يا ست الكل يا أرض
الفل وريحانة
تشم تقول آه يانا
دي نسمة
كلها بحرية
وجنب الأرض
فيه ميه
تروي الأرض
وسبيل للعطشان
يروي القلب
لو كان حيران
يا أرضي يا منورة
بالخضرة

ومزهرة
أحبك بكل
ما فيكي
لو حتى
طلع شيطان
على حافة
الترعة
والبط ماشي
يسبح فيكي
والوزة
يا جمال منظر ك
وراحة البال
يا حلوة
يا طيبة
تعيشي للأجيال
وتر يحي بالهم
وهي دي راحة
البال

مرايا

حبيب العمر
رأيتك في كل المرايا
وفي صحبة خيالي
رأيتك في صحوي
وفي مناماتي
رأيتك بين جفني
وكنت عمق عيني
عطرك الفواح يملأ أجوائي
سبحت في كل أوردتي
فأنت من عصباتي
إنك ظل يظللني
يحمي كل جنباتي
نورك ينير طرقاتي
فأنت نوري وكل حياتي
يا كوكباً يمشي
على الأرض

فتفتح زهراقي
يا من سكنت له في
كل آهاتي
فلا أرى مثلك يا حياتي
أوصيك بشريانٍ
يكون ترياقِي
حتى نهاياتي
حبيب عمري
وكل حياتي

أمي

أمي يا أجمل شيء في عمري
اتحملتي فيا وشيلتي
وفي سنوات العمر تعبتي
كنت الشمعة لطريقي
من أول ما حيت كنتي
تلفي حواليا البيت
وأنا أضحك وتبكي
لو حتى بكيت
لما وقفت حبة
لقتك سانداني
شوية شوية
جريت لقتك حاضناني
دايمًا جنبي
حاسس بأمان
آه يا زمني
عد من تاني



كانت أحلى
أيامي
في دراستي
كنتي النور
وزرعتي
طريقي
بزهور
بنجاحي
الدنيا تلف
وتدور ألاقيكي
قدامي
بسمة وضحك وأغاني
عدت سنيني
بسرعة وكبرت
وانتي شايلاني
في قلبك وجوا
الرمش مخياني
وأنا دفيان



بالحنين
وعشرة سنين
يا أغلي أم
عمري ما هنسى
طول السنين
أمي يا قلب وحنين

العدس

يا عدس جه يومك
لما الشتا جالنا
بسرعة حطيتك
على نار هادية
فيك البصل والجزر
والثومة دي نيّة
وطماطم تلونك
تحلي طعمك
الله على ريحتك
ملت العمارة
وناس مش طايلة
وعندي بصل أخضر
وهزوقك
بشوية شعرية
انت تدفيني
وتسقينني ميه
أتغدي منك

وفي العشاء غية
يا سيدي عليك
وانت مغروف
في سلطانية
تعدل مزاجي
مية مية
أحلى منك
ما لقيت في
الصقعة ديه
عنك
أكتب كتب
وأغنيلك
على الربابة
وأقول يا عدس
لا يمكن أشبع منك وأغنيلك
يا عدس صيتك
ملاً الدنيا
جه وقتك
يا حبيبي

تدفيني
تشبعني
تهنيني
دي حلتك
بتشجينني
وعلى عليها
تطمني وترضيني
دي شربتك
وفتتك
تملاً دموع عيني
من حبي فيك
قلت مواويلي
في ليلة
شتا
تأنسني
وترم عضمي
وتشفيني
يا عدس يا مدفيني

أرضك، عرضك

رسالة

حبيبي يا غالي
أحب أعرفك
بلدك هي عرضك
خاف عليها زي أمك
واحمي كل حبة رمل فيها
بقلب جامد ولا يهملك
هتعرف ناس وصحبة جديدة
دول إخوانك وولاد بلدك
هتكونوا إيد واحدة
على الحلوة والمرّة
الشجاعة دي سلاحك
هتتعلم كتير من القادة
وتكون صبور
ما هو القائد كان في العلام
زيك

خد بالك يا ضنايا
من أرضك
أرض أجدادك
وأرض أبوك وأمك
حافظ عليها من أي دخيل
دي الشجرة فيها لو مالت
تتقلع من جذورها
ودي رسالة حافظ عليها
تكون ضلك
وتبقي تاج تزين إخواتك
وتفرح أبوك وأمك



صياح الديك

صياح الديك
نبهني بأن الفجر قد لاح
فقمتم أشم هواء الفجر
وقلبي يدق بارتياح
توضأت قبل أذان الفجر
كي أدعو لمن عاش
ومن راح
فدعوة الفجر
يا لها من فلاح
وصون نعمة ربي
لمن قال حي
على الصلاة
حي على الفلاح
عشقت نور الصباح
وملكت قلبي
بكل ارتياح

فيا رب
لا تحرمني من نور الصباح
وذكرنا بحی علی الصلاة
حي علی الفلاح

الغربة

ليه الغربة
ارجع تاني هستناك
ارجع تاني تلاقي حناني
اوعى تسيب القلب الأخضر
لاحسن يهجر
إياك تقسى وفي بعدك تنسى
بترجاك ارجع تاني هستناك
فاكر لما مسكنا العقد
وحبة بحبة فضلنا نعد
وقبل ما يخلص حب العقد
لقيت البعد
ليه يا زمان كنا بنحلم كان ياما كان
وطول يا زماني لحد الحب ما يرجع تاني
دانا بحياتي عايشة معاك
عشقت هواك
وطول العمر هستناك
بترجاك ارجع تاني هستناك

روبايكيا

يا بتاع الروبايكيا اطلع لي أوام
عندك إيه يا بيه.. عندي كتير
عندي هدومي تملالك مول
وعندي بنورة مشروخة مش موجودة في أي مكان
بس اتشرخت زي قلبي تمام
يمكن عندك تبقى تمام
عندي كاسات فضة مختومة
ومرايات كذبت عليا خليت وشها للشباك
وعندي خزنة ماتتقفلش
من كتر كرشها متشبعش
بس كفاية يا بيه
وأنا أجيب كل ده منين
استنى شوية.. أنا هديك كله ببلاش
بس اسمعني.. عندي عربيات أشكال وألوان
ومخدرات ريش نعام
وغطايا حرير في حرير

لكن شوكة كثير

عندي عش عصفورة.. ذهب في ذهب

بس باباه مكسور

ليه.. ليه يا بيه.. كان في عصفور كسر الباب

خنقته الحبسة يا بيه.. وعرفت مين

ما هي واضحة يا بيه..

كان عصفور عنده أخلاق

لا يهمه مال ولا جاه.. طيب وملاك

اتحداني بضميره الصاحي

وقال لي ماباكلش لقمة حرام

كان بيغور دمي.. من كتر ضميره مايينامش

رحت أنا حابسه علشان ميتكلمش

كنت أسمع في الفجيرة بيدعي لي

ربنا يهديني

اتجننت أكثر.. قمت عليه ضرب في ضرب

لحد ما انكسرت رجله

هو يتألم وأنا أضحك

لحد ما خفت رجله



كسر الباب وطار
ما عرفش أنا راح فين
سكت بتاع الروبابكيا شوية وقال
لا يا بيه أنا عندي عيال
آكل لقمة بعرقى أحسن من كل اللي اتقال
خلي حاجتك عندك ماتلزمينش
أنا م على فرشتي وأنا مرتاح
واوعى تنادي عليا ولا أقول لك
مش ماشي من شارعك تاني
وسلام



البنات

البنات البنات ماليين الكليات
ياللا يا بابا سهل لعريس بنتك
خلي الطلبات على قد الإمكانيات
وبلاش ماما تقول أي اقتراحات
الشبكة هدية ولا تحديد
على قد جيبه هيجيب
والثلاجة لا طول ولا عرض
لا مستورد المصري يهز الأرض
البوتاجاز يقضي الحاجة
كفاية الغاز
خلي شبابنا يتجوز ولا يهربش
ويدور على سفيرة لبرة وما يكملش
سهلوا لولدنا تتلم وتكبر عيلتك
وتشيل عنهم الهم
أنا بتكلم مابهز رش
خد بالك علشان ابنك لما يتجوز



زي ما سهلت لبنتك ربنا هيعوضها في ابنك
والفرحة جوا القلب لا تقول فندق ولا فستان
مشغول ألماظ ولا زفة زي بنت فلان
خليك في الصبح زي مالنا
تفرح بولادك تتهنى
دي الفرحة جوا القلب
عرفتي يا ماما وانت يا بابا
البنات البنات ماليين الكليات



السوق

راكبين عربية نقل أم سماح والطاهرة
وهانم على السوق
واخذين جبة قريش وحاذقة ودا توم وشوية ملوخية
وعيش مفروود ومدور للأكلة اللي يحبوه
فلفل وخيار وكوسة غير دكرين بط مزغطين فول
والبيض البلدي الطازة ولبن حالباه من الفجرية
جاموسي وقشطة مية مية
وقرص معجونة بلبن رايب وطرية
ياللا يا حبايب
مين يشتري من صنع إيديا
يا حلويات خدي مني دكر بط نقاوة وتربية
مع رز معمر ورقاق وده شغل إيديا
راح تدعلي يا عسلية
جبة قريش دي بخيرها وقشطة
ياللا يا غالية
بلاش فرجة ومتنفعنيش
لو خدت مني مرة ماهتنسينيش

عم حسين

صحيت من البدرية، قبل الشمس ما تطلع بشوية،
صليت الفرض اللي عليا، وحمدت الله وشربت
الشاي مع لقمة فاضية، وبوست إيدي وش وضهر،
وشكرت الرب وبدأت اليوم. سميت ومشيت ودعيت
يفتحها عليا والرزق من عند الله، وفي جيبي قرشين
أعرف أجيب بيهم شوية شطة وبتنجان وفلفل أخضر
طازة، رحت السوق في مكاني قعدت، وفرشت الخرقة
اللي معايا، ورصيت كل اللي معايا.. وقلت يا رب
الرزق من عندك انت الرزاق، وندهت شطة وفلفل
وبتنجان طازة تأكل منه ني ومقلي وهتدعيلي كمان،
ربك ما بينساش عدى ساعتين وجبرت والحمد لك يا
رب. لميت الخرقة ونفضت هدومي من القعدة على
الأرض، ماشي مبسوط وراضي، وأنا في طريقي لقيت
شنطة على الأرض، بصيت شمال ويمين ماشفتش
حد، خدت الشنطة ورحت فتحتها، لقيتها مليانة
فلوس تملأ البيت، بس استغفرت.. أخذتها وجريت

على نقطة جنب البيت، سمحولي أدخل للضابط،
قتله على كل اللي حصل بالضبط، قعدني وطلبلي
شاي وكلامه معايا كان زوق، فتح الشنطة لقاها كلها
دولارات وفيه ظرف معاها مكتوب اسم ورقم تليفون.
الضابط قال لي رغم إنك غلبان ما طمعتش فيها، قلت
يا بيه وهطمع ليه وربك مقسم الأرزاق، وهروح من
ربنا فين وحسابه يبقي عذاب، اللقمة الفاضية يا بيه
والحمد والشكر ليه والرضا أحسن من أي فلوس..
توكالي عليه ورزق عيالي أنا وأنا مرتاح. الضابط قال
لي سيب اسمك وعنوانك يا راجل يا أمين، ربنا يصلح
حالك بالحلال.. مع السلامة يا عم حسين، إن شاء الله
بكرة هجيب بطاطس وخضار وطماطم، ورد.. مين
يشترى من عم حسين.



قعدة الصبح

قعدة الصبح
يوم الأجازة
فيها لذادة
والجو في البلكونة
والشمس طالعة منورة
نجيب الشاي علشان نفطر
وكيك معمول بشوكلاتة
الشمس دافية ورجليها حافية
عشان العافية تشد الحيل
القعدة مع الحبايب
تزيدها جمال
على الضهر نشرب قهوة
محوجة بالحبهان والمسكتة
بص للفنجان كله ألوان
شكله يخلي القهوة جنان
تطلب منها زيادة

جه دور المكسرات خد وهات
قزقزة وحكايات وحكايات
والشمس باصة علينا مجملة
القعدات

وسحلب سخن متوصي عليه
لبن طازة متجمل بزيب ومكسرات
يا جمال يوم الأجازة والقعدة مع الحبايب
تسالي وحكايات وحكايات ومقترحات
يوم الأجازة كله لذادة



يا بحر

الله عليك يا بحر وعلى ريحتك
ترد فيا الروح وأنا على شطك
وأكلمك وألاغيك
وأنا سارحة بكل كياني في شكلك
موجة تجري ورا موجة أسقفك
شتا أو صيف أحب أروح أندهلك
وأقولك يا بحر أنا في كل وقت
أنا بحبك

ونفسي كل يوم أجيلك
بتوحشني وأشوفك
رايق وهادي بلونك الأزرق
وأسبح بخيالي معاك
وأحلم وأعيش حلمك
خليني معاك
يا بحر ماتحرمينش منك
ومن رحتك
دا يودك ينعشني وأفوق أنا
على ريحتك

حلويات

أحلى البنات يا سكر نبات
الطعامه وحلويات
وخفة دم وخد وهات
ذكية من المقبلات
مهضومة مش زي بنات
تملا
المكان شوكلاتات
ربنا يخليها لينا ست البنات

حكاية حمامة

حمامة طارت من الغية
راح الحمام يسأل عليها في كل بنية
وقفت حمامة على شجرة عشان تترتاح
سمعت زقزقة عصفور
قالها أنا عارف بدوري على إيه
حمامة من غيتك طارت ومش عارفه جرالها إيه
حمامة غريبة جاتلها ووقفت جنبها شغلتها وضحكت
عليها وخذتها لبعيد
ارجعي يا حمامه غيتك وانسي صحبتك
اللي حصل محسوب عليكى وعلى غيرك
وخدي نصيحة من عصفور
جسمه صغير لكن حكمته بطول
واوعي حد يضحك عليكى ويغويكى
دي الشجرة دي شجرتي
وشجرتك

والغصن مال من وقفتي

ووقفتك

وافتكري حكمة من عصفور جسمه صغير

لكن حكمته بطول

حنين

خد قلبي وراح
وسابلي كل الجراح
ما ارتحت يوم من يوم ما راح
قلبي بيبكي عليه
والعقل مشغول بيه
حيرانة وتعبانة
ما أعرف جرالي إيه
قلبين عاشقين ملتحمين
وعشرة بقالها سنين
بقيت وحدي ما بين
ومش عارفة أنا مين
الدمع نشف من العين
حياتي معاك جنة العاشقين
دبت في هواك يا نور العين
عشرتي وياك أحلى سنين
مش ممكن أنساك

مهما فاتت سنين
كنا في الحياة حلوين
سندي وعزوتي.. وحنين
وقلب طاهر في حبه
ليه طول السنين
مع السلامة، إلى لقاء
يا عمري اللي راح

الثوب

قالولي البسي
ثوب أسود
مع إن اللي راح
لابس ثوبه الأبيض
زي قلبه تمام
مكان أبيض

هوا السواد
يداري جروح
الناس
ولا العادات
خلتها لون أسود
الحزن جوا القلب
لا بلون أحمر أو
أسود
الحزن جوا القلب

لا يميز
ما بين ألوان
القلب هو الحكم
في معزة الإنسان
يا ناس
الأسر مش في السواد
الدنيا ماتساو يش
لا أبيض ولا أسود
الحكم
مين تلبس
عليه وتتظاهر
ومين كان حبه
لنا طاهر
وكان إنسان
هو ده وخلص
الكلام
لا أبيض ولا أسود

نعمة

بسم الله صبحنا
وبعد الصلاة سبحنا
وحمدنا ربنا ونجحنا
حضرت ماما فطارنا
ندهت علينا اتجمعنا
الإخوات وماما وبابا
الله على ريحة الفول بالزيت ولمون
استفتحننا
والطعمية السخنة أكلنا
والعيش السخن بابا جابهولنا
والتحلية عسل أسمر
بطحينة
أكلنا كلنا وشبعنا
واللبن الدافي شربنا
وحمدنا الله ونزلنا
على مدارسنا روحنا
نشاط كلنا وهمة
عارفين ليه علشان

إحنا فطرنا
أصل الفطار ده مهم
يدينا القوة
يفتح مخنا لدروسنا
وتقوم الهمة
والصحة تبقى عال العال، ربنا يخلي
بابا ومامتنا
واخدين بالهم منا
مش هاملينا
متابعة ونظافة وديننا
وصلاتنا كلها
حافظينها
ونؤديها في موعدها
يحفظنا ربنا ويصونا
يا رب يخلي بابا وماما.. علمنا
شاكرين حامدين
والفضل ليهم على
تعليمنا
وعجبي

الجيران

زمان كان عال العال
الرضا بالمقسوم.. ستر العيال
الروح كانت صافية رغم ضيق الحال
لكن اللقمة كانت كافية.. تأكل كل العيال
كان الجار يخاف على جاره.. مش عشان المال
عشان الحب كان مالي المكان أتلال
الأمان في اللمة تطمنك ع الحال
تلاقي اللي يسندك وياخد بإيدك في الحال
كان ياما كان.. كان زمان
دلوقتي الجار ما يعرف جاره
لامم أسرته حوالية
لا في عيد يمسي على جاره ولا حتى يعرف اسمه إيه
اتغيرت يا زمان ليه، هو حصل إيه؟
كترت هموم الدنيا وضافت عليه
يا رب رجع لخلقك الأمان..
ويرجع بينا الزمان
يعدل اللي انكسر فينا..
والحب يرجع بيننا زي زمان

إلى الحبيب

إلى الحبيب

شكرًا لك يا حبيب عمري

حين عزفت على أوتاري

حين التقينا في سهراتي، والتقطت عيني غاياتي

حينها عزفت على كل أوتاري وارتعشت كل خلجاتي

وعشت أفكر في حالتي.. وجئت لي

يا لها من روعة اللقاء

مددت يدك تسلم علي، مددتها ترتعد كي تدفئها بين

يديك

ورددتها إليّ

أشم فيها رائحتك.. يا حبيب عمري

أحببتك من كل وجداني.. لست أدري كيف جاء يا

حياتي

من عينيك التي سبحت فيها خيالاتي

فأحب أوتار تغذي كل كياناتي

شكرًا لك يا حبيب عمري

راح.. راح

العمر راح
بعد ما شاف

الجراح
والطريق كله

سراب
والضباب

خيم
على نور

الصباح

يا قلبي

نام وارتاح

منين

أجيب

الراحة

وأنا كلي

جراح

طريقي

طوّل عليا

وَقَلْبِي
مَش
مَرْتاح
فِيهِ مَرارة
عَلَى الِلي
راح، راح، راح
لِيهِ يا دُنْيا
تاعِبَة قُلُوب
ما تَرْتاح
هو اَنْتِي
كَدِه
عَلَى
طول
الِلي يَعايش
فِيكِ
عَمْرَه
ما يَوم
يَرْتاح
راح، راح، راح

أنا المسئول

سنين عمري ضاعت
وأنا في الغربة
أنا المسئول
شبابي ضاع
مني وشعري
شاب على طول
تشوفني تقول
ده مش سني
مش معقول
سنين فانت
طويلة عليا
وأنا مطحون
أروح شغلي
ويومي يطول
وأرجع بيتي
مش قادر

أنا م على طول
بالذمة دي عيشة
ألوم نفسي
ما أنا المسئول
دي الغربه
بتقصر العمر
مش ي طول
وأقول فين
بيتي وأرضي
مشتاق
وليلي ي طول
ليه يا غربه
شلتيني
بعدتيني
عن الأهل والخلان
وأمي وأبوي
وعمي كمان
وأولادي ونور عيني

ما شفّتهم بقالي زمان

أنا ندمان

يا ريت يرجع

الزمن بيا

ويرجعلي شبابي

في غربتي دية

وأرجع بلدي

مجبور لو هعدي

بحور

أنا ندمان

على عمري اللي ضاع

وزمان

يا ريت أرجع لداري

وعزوتي وضحكتي

أنا ندمان

الفهرس

| | |
|---------|-----------------|
| ٦..... | وحشتنا يا خال |
| ٨..... | جافاني النوم |
| ٩..... | اسمعني يا عصفور |
| ١١..... | ارجع يا زمان |
| ١٤..... | حنان |
| ١٥..... | حلم الحياة |
| ١٩..... | مناجاة |
| ٢١..... | مسافر |
| ٢٤..... | الندم |
| ٢٧..... | ذكريات |
| ٢٩..... | حببي الغالي |
| ٣٤..... | بيتنا |
| ٣٩..... | الفيس الفيس |
| ٤٢..... | ونيسي |
| ٤٤..... | خيانة |
| ٤٦..... | الفراق |
| ٤٨..... | سيكا سيكا |
| ٥٠..... | العاشق |
| ٥٥..... | العزیز |
| ٥٧..... | هاتولي من الفرح |
| ٥٨..... | قليل الأصل |
| ٦٤..... | قلبي مال |



| | |
|-----|------------------------|
| ٦٦ | تراث..... |
| ٧٠ | رسالة إلى كل أب |
| ٧٣ | غاب القمر |
| ٧٤ | حبي الوحيد |
| ٧٧ | رفيق الدرب |
| ٧٩ | ترياقتي |
| ٨١ | الوداع |
| ٨٤ | الوداع |
| ٨٤ | الملهم |
| ٨٦ | الكؤسة |
| ٨٨ | رسالة إلى الحبيب |
| ٩٠ | فراشة |
| ٩٢ | فساد |
| ٩٣ | مولود |
| ٩٥ | جواب |
| ٩٧ | ليالي |
| ١٠٠ | مرايا |
| ١٠٢ | أمي |
| ١٠٥ | العدس |
| ١٠٨ | أرضك، عرضك |
| ١١٠ | صياح الديك |
| ١١٢ | الغربة |
| ١١٣ | روبائيكيا |
| ١١٦ | البنات |



| | |
|-----|-------------|
| ١١٨ | السوق |
| ١١٩ | عم حسين |
| ١٢١ | قعدة الصبح |
| ١٢٣ | يا بحر |
| ١٢٤ | حلويات |
| ١٢٥ | حكاية حمامة |
| ١٢٧ | حنين |
| ١٢٩ | الثوب |
| ١٣١ | نعمة |
| ١٣٣ | الجيران |
| ١٣٤ | إلى الحبيب |
| ١٣٥ | راح.. راح |
| ١٣٧ | أنا المسئول |

